



07. oktober 2013

UKA 2013/124

## NAQQIUT/RETTELSSEBLAD

SIUNNERSUUTIP KALAALLISUUA 6. AUGUST 2013-MIK  
ULLULERNEQARSIMASOQ MATUMA TAARSERPAA

(Siunnersuutip kalaallisuuata qulequtaata naqqinneqarnera)

Matumuuna Inatsisartut suleriusaanni § 33 naapertorlugu aaliangigassatut siunnersuut saqqummiuppara:

**Imartani Kalaallit Nunaata aalisarnikkut oqartussaaffigisaani raajarniarneq pillugu Namminersornerullutik Oqartussat nalunaarutaata nr. 23, 29. august 2002-imeersup allanngortinneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni kilisaatit umiarsuarmi namminneq tunisassiorsinnaasut, basis-liniemiit 3 sømilit iluanni aalisarsinnaatitaannginnissaat atuutitertinneqartussanngorlugu.**

(Inatsisartunut ilaasortaq, Siverth K. Heilmann Atassut)

**Tunngavilersuut:**

Ilimagaara aalisariutit anginerit sinerissatta qanittuani aalisartut immap naqqanut aammalu aalisakkat suffisarfiinut pitsaanngitsumik sunniteqartut. Tamatumunnga ilaatigut peqqutaavoq taakkunani kilisaassuit aammalu qalorsuarnik marlunnik kilisannerminni atuisuummata. Kilisaassuit sinerissap eqqaani atorneqartut aalisagaqassutsimut innarliisinnaaneri taamaalillutillu aalisakkat suffisarnerinut allanullu ajoqutaasinnaaneri isigaakka.

Sinerissap qanittuani raajarniarneq nunatsinnut, illoqarfinnut raajaleriffiusunut kiisalu aalisartunut annertuumik inuuniarnikkut atugarissaarnermullu tunngaviliimmat kialluunniit nunatsinni najugaqartup illersugassaraa minnerpaamillu ullumikkut ajornerulinnginnissaa qulak-keerniagassaralugu, tamannalu assigiinngitsutigut anguneqarsinnaavoq sorlerli pitsaaneruva?

Ilaatigut makkua nalilersuutigissallugit takorloorneqarsinnaavoq, kilisaatit 30 meterimiit anginerusut tamarmik basis-liniemiit avammut 3 sømil-ip iluani aalisaaqusaassanngitsut assersuutigalugu 67 gr 30 min-imiit 71 gr 00-imut, tassami piffimmi tamaani rajaaqarfiit annertuumik piffissaq kingulleq aalisarfigineqaramik malunnavissumillu allanngoriartorlutik kiisalu aamma tamaani qaleralinniarneq ingerlanneqarluni.

Kilisaatit angisuut massakkutuut aalisaannarpata imaluunniit tamarmik ammaaneparalarpata suli ajornerusumik kingunissaa unaavoq, sinerissap qanittuani raajarniarneq suliffissuarnut tulaasuisussaataasut tamarmik eqqorreqassapput raajaqassutsip innarlerneqarneratigut. Kiisalu nunami suliffissuit, pisiniarfiit, saffiut orsiisartut allarpassuillu taamatulli eqqornerlunneqassallutik. Kilisaassuit angisuut namminneq nioqqutissiortuupput nunamilu annerusumik suliffis-

saqartitsisarnatik tamannalu annertuumik inuuniarnernikkut tungavimmik immi innarleeriisaaq kingunerisinnaasaali allat aamma takorluuinnarsinnaavagut.

Piffissap ingerlanerani piumasaaqatigineqarsinnaavoq angallatinut 30 meteriniit mikinerusut sinerissallu qanittuani aalisartut aammalu immaqa saarlisaartut ikerinnarsiutit atorneqassasut, immap naqqata aalisakkallu natermiut uumaffiisa aserorterneqarnerat annikillisinneqarsinnaammat. Qeqertarsuup tunua saarlisaartunik natersiutunik atuiffigeqqusaajunnarsinneqarsinnaavoq taamaaliornikkut qularutissaanngimmat raajaqassutsimut aalisagaqassutsimullu pitsaasumik sunniuteqassasoq.

Teknikkikkut atortutigullu ineriartorfiujuarpoq, tassami kilisaatit ilaannit atorneqarpoq saarlisaartut immap naqqaniit 5 – 20 meterillu akornanni qangatatillugit atorneqarsinnaallutik taamaalillunilu immap naqqa aserortinnginnerullugu kiisalu saarlisaartut nungullarsannginnerullugit aammalu CO2-mik annikinnerusumik aniatitsisoqarsinnaalluni.

Aasakkut kinguppaat qalipaasa aqilinerisa nalaanni, raajarniarnerup unitsinneqarsinnaanera juni juli-liluunniit pisinnaavoq, tassami pisuussutinik atorluaanerunngimmat, aqitsunik qalipallit aalisassallugit, suliffissuarnit vrag-igassanngorlugit pisassanillu ilanngaataassallutik taamalu pisassat killeqareertigisut. Kingunerissavaa raajartassat pissarsissutaaneruleneri kiisalu pisuussutinik atornerluinerup annikillinera aasakkullu inuit feeriarnerisa nalaanni suliffissuit ilaatigut sulisussaaleqisarnerullu nalaani atorluaanerussalluni.

Naggasiullara aalisartut annertusiartuinnartumik pisassaannik killilersugaajuarput naak imartat-sinni aalisagarpassuaqaraluartoq, uumasulli miluumasut pingaartumillu Qipoqqaat allallu killeqanngitsumik aalisakkanik nungusaasuupput, ilanngarterneqanngikkunillu aalisartortatsinniik aqunneqarsinnaanngitsumillu aalisartuartaassaapput, nunatta karsianut iluaqutaanngilluinnartumik.

Siunnersuutip allaffissornikkut aningaasarsiornikkullu Namminersorlutik Oqartussanut kingunissai: Nalunaarutip qulaani pineqartup allanngortinnissaanut aningaasartuutissat annikitsuaraanissaat naatsorsuutigineqarpoq, aningaasartuutit tassunga tunngasut allaffissornermi aningaasartuutissat iluanniissasut nalilerneqarpoq.

#### **Siunnersuutip aningaasatigut namminersortunut kingunissai:**

Anginerusunik angallataatilinnut sinerissap qanittuani aalisartunut aningaasatigut kinguneqarnissaa ilimagineqarsinnaavoq. Naliliinermili isiginiarneqassaaq aalisariaaseq taamaattoq aalisakkat suffisarfiinut ajoqutaasinnaasoq, tamatumalu kingunerisinnaavaa pisuussutit uumassusillit aammalu aalisariaatsit allat siunissami ungasinnerusumi ajorseriarnissaat. Taamatuttaaq ilimagaara sinerissap qanittuani aalisarnermi aningaasarsiorneq pitsanngoriassasoq aalisarfiit taakku sakkortuumik ilungersunartorsiorfiusumillu aalisarfigineqarunnaarlutik aalisariutinik sinerissap qanittuani taamaallaat atussallugit naleqqunnerpaanik aalisarfigineqalerpata.

#### **Siunnersuutip aningaasatigut innuttaasunut kingunissai:**

Ataatsimut isigalugu nunatsinni inuiaqatigiinnut siunnersuutip iluaqutaanissaa naatsorsuutigineqarpoq, siunnersuutip kingunerissammagu sinerissap qanittuani uumassutsip illersorneqarluarnerunissaa, isumaga malillugu tamatuma aamma qulakkiissavaa aalisarnerup pinngortitami ataavarnissaata tunngavissaqarluarnissaa. Aammattaaq naatsorsuutigaara siunnersuutima sinerissap qanittuani aalisarnerup piffinni taakkunani aalisarsinnaalerunik aammalu nunami suliffissaqartitsinerup aningaasatigut iluaqutigissagaat, angallatit taakku aamma tunisassiorsinnaanatik nunamut tunisariaqarnerat isiginiarneqassammat.